



Il nov policist sursilvan cun ses geniturs: Tina Manetsch, Franco Manetsch e Giusep Manetsch (da san.).



Gratulaziun da Duri Campell, il president dal cussegl grond, per Anita Denoth, la nova policista da Lavin.



Quatter novs policists da Tavau: Fabio Gruber, Dominik Herzog, Marco Agnello e Simon Gujan (da san.).



Polizia, politica e militar tar la festa da brevetaziun: Gianfranco Albertini, Christian Rathgeb e Franz Nager (da san.).



Riccardo Thomann, il nov policist da Seglias cun sia famiglia.



Sarmentaziun dals novs policists.

FOTOS G. N. STGIER

«Confidenza è colliada cun cundiziuns»

Cuira: Brevetaziun dals novs policists

DA GION NUTEGN STGIER / ANR

■ Dapi venderdi ha il chantun Grischun ina nova policista e 15 novs policists. Suenter la scolaziun da basa rinforzan els uss il corp da polizia chantunal. Per la dunna ed ils umens cumenza uss ina nova veta professiunala cun blera responsabladad. En in rom festiv ed en preschientscha da Duri Campell, il president dal cussegl grond, e cusseglier guvernativ Christian Rathgeb èn la nova policista ed ils 15 policists novs vegnids brevetads. La festa da brevetaziun è vegnida enramada musicalmain – sco ch'igl è tradiziun – da la Musica da la polizia dal Grischun. Durant in onn han els absolvi la scola da polizia ad Amriswil (TG) ed èn gia stads activs – en il rom d'in praticum – durant intginas emnas en il chantun Grischun. A partir dal 1. d'october 2014 fan els uss uffizialmain part da la polizia chantunala dal Grischun – cun tut ils dretgs e cun tut las obligaziuns ch'il servetsch da polizia cuntogna. Da preschent ha il corp da polizia da noss chantun 400 policistas e policists e radund 60 autras persunas che fan servetsch senza uniforma. Las empermischuns correspondentas sin la bandiera dal Grischun han els fatg durant la fe-

sta da brevetaziun. Ultra da las confamigliaras e dals confamigliars da las persunas brevetadas èn sa participadas er numerusas represchentantas e numerus represchentants da la politica e da l'administraziun sco er d'organisaziuns partenarias a la festa.

Er savens situaziuns difficilas

Il cumandant da la polizia chantunala dal Grischun, colonel Walter Schlegel, ha accompagnà ils absolvents da la scola da polizia durant l'entir onn da scolaziun. Per el èsi impurtant d'emprerder d'enconuscher sia nova collavuratura e ses novs collavurats. En vista al mintgadi da lavur che suonda ussa ha appellà Schlegel a sia nova collavuratura ed a ses novs collavurats da reagir da tut temp ed er en situaziuns difficilas en moda persvadenta. L'emprima impressiun en il nov lieu da lavur saja da gronda impurtanza. Walter Schlegel ha er ditg a la nova policista ed als 15 novs policists ch'els vegnian betg per adina a far servetsch en lur emprim lieu da lavur. «Vus essas er ambassadurs envers collavurats e collavuraturas per dar a la polizia moderna novs impuls cun gist avair terminà la scolaziun», ha ditg Walter Schlegel. «Ina prisas umor dastgais vus er avair, dentant cun

ina tscherta resalva, ha il cumandant maneggià. L'entir corp da polizia stoppia adina esser conscient dal fatg ch'el saja engaschà per la segirezza da la populaziun.

Dapli che suttascriver in contract da lavur

Il cusseglier guvernativ Christian Rathgeb ha gratulà a la nova policista ed als novs policists che han fatg cun success lur examen final. Il schef dal departament da giusta, segirezza e sanadad ha punctuà che far l'empermischun d'uffizi saja bler dapli che suttascriver in contract da lavur. La sarmentaziun saja in ritual uffizial, tradiziun, cun il qual vegnia sigillada ina relaziun da lavur e da confidenza fig speziala. Il directur da la polizia ha explitgà plinavant che – cun prender giu l'empermischun d'uffizi – surdetia la populaziun a las poliaistas ed als poliaists il monopol da pussanza. Quest mussament da confidenza saja collià cun cundiziuns, numnadamain ch'els meds impundids na vegnian mai duvrads cunter ils interess dal stadi, mabain per proteger il corp e la vita da tut la populaziun, per mantegnair la quietezza, la segirezza e l'urden, per garantir la convivenza paschaivla e l'egualitad giuridica sco er per defender la constituziun e las leschas.



La nova policista ed ils novs policists cumenzan l'entschatta d'october lur lavur.